

प्रादेशिक समाचार

- प्रधानमंत्री नरेन्द्र मोदी कयो –सरकार अंगदान सारू देश मांय एक समान नीति लावण माथे काम कर री है— श्री मोदी लोगां ऊं अंगदान सारू आगे आवण री अरज करी।
- आकाशवाणी रा “मन की बात” कार्यक्रम मांय प्रधानमंत्री देश मांय कोरोना संक्रमण रा बधता मामला ने देखता सावचेती बरतण ने कयो।
- भारतीय जनता पार्टी रा नुवा नियुक्त प्रदेश अध्यक्ष सी.पी. जोशी काल जयपुर मांय प्रदेश भाजपा दफ्तर मांय ओहदो संभाळेला।
- राइट टू हेल्थ बिल री खिलाफत मांय प्रदेश मांय डॉक्टरां री हड़ताल अर काम रो बहिष्कार चाले—मुख्यमंत्री अशोक गहलोत री हड़ताल खत्म करण री अरज।
- शांति अर अहिंसा महकमा कानी ऊं दो दिन रो खादी अर ग्रामोद्योग सम्मेलन बीकानेर मांय सरू।

000

प्रधानमंत्री नरेन्द्र मोदी लोगां ऊं अंगदान सारू आगे आवण री अरज करी है। आकाशवाणी रा मन की बात कार्यक्रम री 99वीं कड़ी मांय आज श्री मोदी कयो के ऐडा जरूरतमंद लोगां री तादाद घणी बत्ती है, जो अंगदान रो इंतजार कर रिया है। प्रधानमंत्री कयो के भारत मांय परमार्थ ने इतरो बत्ती मान्यो जावे के लोग दूजां रा सुख सारू आप रो सब कुछ दान करण मांय ई कोई संकोच नी करे। वणा इण बात माथे संतोष जतायो के केन्द्र सरकार अंगदान सारू देश मांय एक समान नीति लावण माथे काम कर री है। श्री मोदी कयो के अंगदान सारू राज्यवासी होवण री शर्त हटावण रो फैसलो करी ज्यो है। इण ऊं लोग किंण ई राज्य मांय अंगदान सारू आपरो नाम मंडा सके है। सरकार अंगदान सारू 65 साल ऊं कम उम्र होवण री शर्त ने ई खत्म करण रो फैसलो लियो है। श्री मोदी कयो के देश मांय अंगदान रा बारा मांय जाग बध री है।

प्रधानमंत्री कयो के वे अंगदान रा पुण्य रो काम करण वाळां रा मन री बात जानण सारू लम्बा बगत ऊं इच्छा ही। श्री मोदी पंजाब मांय अमृतसर रा रेहवासी सुखबीर सिंह संधू अर वां री जोडायत सुप्रीत कौर री 39 दिन री बेटी रे गुजर जावण माथे उण रो अंगदान करण रो जिकरो करयो। प्रधानमंत्री झारखंड री अभिजीत चौधरी ऊं ई बतळ करी, जिण मांय वां री मां स्नेहलता चौधरी 63 साल री उम्र मांय आपरो दिल, गुर्दा अर लिवर दान कर्या। प्रधानमंत्री देश मांय कोरोना संक्रमण रा बधता मामलां ने देखता सगळा ऊं सावचेती बरतण अर सफाई राखण री अरज करी है। वणा कयो के आवती 30 अप्रैल ने होवण वाळा मन की बात कार्यक्रम री सौवी कड़ी ने ले र लोगां मांय घणो उमाव है। श्री मोदी कयो के वे सौवीं कड़ी मांय सुणण वाळां रा सुझावां अर विचारां ने जाणण सारू घणा उमाऊ है।

प्रधानमंत्री नवरात्रि रे मौके केई खास महिलावां री चर्चा करी। वणा कयो के नुवा भारत ने बणावण मांय स्त्री-शक्ति री मोटी भूमिका है। प्रधानमंत्री कयो के रमजान रो म्हीनो सरू व्हे ग्यो है अर आवता कुछ दिनां मांय रामनौमी ई मनायी जाएला। वणा कयो के महावीर जयंती, गुड फ्राइडे अर ईस्टर ई घणी दूर है। श्री मोदी कयो के अप्रैल रा म्हीना मांय दो महान विभूतियां—महात्मा ज्योतिबा फुले अर बाबा साहेब आम्बेडकर री जयंती मनाई जावे है। मन की बात कार्यक्रम ने राज्य रा टोंक जिला समेत दूजा जिलां मांय लोगां चाव ऊं सुण्या।

000

भारतीय जनता पार्टी रा नुवा नियुक्त प्रदेश अध्यक्ष सांसद सी.पी. जोशी काले दोपहरां जयपुर मांय प्रदेश भाजपा दफ्तर मांय ओहदो संभाळेला। कार्यक्रम मांय पैली री मुख्यमंत्री वसुंधरा राजे, निवर्तमान प्रदेश अध्यक्ष डॉ. सतीश पूनियां, विधानसभा मांय विपख रा उपनेता राजेंद्र राठौड़ समेत पार्टी रा दूजा नेतावां ने न्यूतीज्या है। भाजपा रा नुवा अध्यक्ष सीपी जोशी रो दिल्ली ऊं जैपर तांई मारग मांय केई ठोडां स्वागत कर्यो जाएला। भाजपा कार्यकर्तावां कानी ऊं शाहजहांपुर बॉर्डर, नीमराणा, बहरोड, कोटपूतली, विराट नगर, पावटा, शाहपुरा, चंदवाजी, आमेर अर जयपुर शहर मांय वां रा स्वागत रा कार्यक्रम राखी ज्या है। ध्यान जोग है के भाजपा रा नुवा अध्यक्ष सीपी जोशी भारतीय जनता युवा मोर्चा रा प्रदेश अध्यक्ष ई रिया है। इण रे साथे ही लगतमार दूजी बार चित्तौड़गढ़ ऊं लोकसभा रा सांसद चुण्यी ज्या है।

000

राइट टू हेल्थ बिल रे खिलाफ रेजिडेंट्स डॉक्टरां रे काम नी करण ऊं सवाईमानसिंह सफाखाना समेत दूजा सरकारी सफाखाना मांय ई मरीजां री परेशानी बध ग्यी है। रोज दिखावण आवण वाळा मरीजां री तादाद ई घणी कम व्हे ग्यी है। भारतीय जनता पार्टी री खिलाफत रे बावजूद विधानसभा मांय 21 मार्च ने राइट टू हेल्थ बिल पास व्हे ग्यो हो। राजस्थान राइट टू हेल्थ बिल पारित करण वाळो देश रो पैलो राज्य बण ग्यो है। चिकित्सा अर स्वास्थ्य मंत्री परसादी लाल मीणा अर आला अहलकारां रे साथे बैठक करने हड़ताल रे बारा मांय चर्चा करीजी। मुख्यमंत्री मुख्य सचिव उषा शर्मा ने डॉक्टरां साथे तुरत मीटिंग करण रा हुकम दिया। श्री गहलोत कयो के राइट टू हेल्थ बिल डॉक्टरां ऊं बतळ रे पछे ई लायी ज्यो है। वां रा सुझाव अर मांगां ने बिल मांय भेळी करने वां री आपत्तियां रो निपटारो कर दीरी ज्यो है। मुख्यमंत्री कयो के ई कानून मांय ऐडो कोई प्रावधान नी है, जिण मांय निजू सफाखाना ने माली तौर माथे परेशानी रो सामनो करनो पडे।

000

झालावाड रा जिला अस्पताल मांय भर्ती एक मरीज ऑर्थोपेडिक वॉर्ड रा शौचालय मांय अनजाण कारणां रे चालता आज संवारा फांसी लगा र आत्महत्या कर ली। कोटा जिला रा खैराबाद रो रेवासी ओ मरीज उल्टी-दस्त री शिकायत रे पछे तीन दिन पेला जिला सफाखाना मांय भर्ती करायी ज्यो हो।

000

लोकसभा अध्यक्ष ओम बिरला आज नुवी दिल्ली रा कांस्टीट्यूशन क्लब ऊं एक कार रैली ने झंडी दिखा र रवाना करया। रैली मांय सांसदां रे अलावा हिफाजती अर अर्ध-सैनिक बलां रा अहलकार, उद्योग जगत अर न्यारा-न्यारा हलका ऊं जुड्या लोग भेळा व्ह्या। इण साल री कार रैली रो विषय 'रोड सेफ्टी' सडक सुरक्षा है। ई मौके श्री बिरला कयो के देश मांय रोड नेटवर्क री लंबाई अर गुणवत्ता मांय घणी चोखी बधवार व्ही है। वणा कयो के राजमार्ग अर सडकां गिनती, लम्बाई अर गुणवत्ता सब मांय बध री है। वणा लोगां ऊं यातायात कानूनां री पालना करण अर दूजा ने ई आं कानूनां री पालना करण री अरज करण ने कयो।

000

कोटा रा श्रीनाथपुरम खेल स्टेडियम मांय सिंथेटिक ट्रैक रो 90 फीसदी काम पूरो व्हे ग्यो है। इण रे 15 अप्रैल ताई पूरो होवण री आस है। ओ ट्रैक 400 मीटर अर 8 लेण रो व्हेला। इण माथे कोई 7 करोड रिप्या रो खर्चो आवेला। लोकसभा अध्यक्ष ओम बिरला हुनरमंद खिलाडियां री जरूरत ने देखता केन्द्रीय खेल मंत्री अनुराग ठाकुर ऊं बतळ करने खेलो इंडिया रे तैत इण सारू रकम मंजूर करायी ही। इण री नींव श्री बिरला लारली साल 31 जुलाई ने धरी ही अर एक साल रा तैय बगत मांय इण री बणायी-चुणायी करायी जावणी ही। कोटा मांय बण रियो सिंथेटिक ट्रैक प्रदेश रो पांचवो सिंथेटिक ट्रैक व्हेला। जयपुर, श्रीगंगानगर, चूरू अर जोधपुर मांय पेला ई सिंथेटिक ट्रैक बण्योडा है।

000

शांति अर अहिंसा महकमा कानी ऊं दो दिन रो राष्ट्रीय थर रो खादी अर ग्रामोद्योग सम्मेलन आज बीकानेर मांय सरू व्ह्यो। आपदा प्रबंधन अर सहायता महकमा रा मंत्री गोविंद राम मेघवाल सम्मेलन रो उद्घाटन करयो। ई मौके वणा कयो के फगत कपडो या उत्पाद नी है, आ एक विचारधारा है। देश री आजादी मांय इण रो महताउ योगदान रियो है। वणा कयो के ई कार्यक्रम री मार्फत देश रा न्यारा-न्यारा हलका मांय खादी अर ग्रामोद्योग सारू काम करण वाळां लोगां अर संस्थावां ने एक दूजा ने समझण रो मौको मिलेला। सम्मेलन मांय देश रा न्यारा-न्यारा हलकां रा 152 खादी संस्थावां नुमाइन्दां भागीदारी कर रिया है। इण मांय उत्तरप्रदेश, पश्चिम बंगाल, तमिलनाडू अर महाराष्ट्र जस्या राज्य भेळा है।

000

प्रदेश रा घणखरां हलकां मांय आवता 3-4 दिन मौसम सूखो रेहवण अर तापमान मांय 2 ऊं 3 डिग्री सेल्सियस बढवार होवण री आस है। मौसम महकमा रे मुजब एक और नुवो आथूणी विक्षोभ 29 अर 30 मार्च ने सक्रिय होवण री आस है। बीकानेर अर जोधपुर संभाग जिला मांय 29 मार्च ने कठे-ई-कठे हळकी बिरखा व्हे सके है। 30 मार्च ने इण विक्षोभ रो सब ऊं बत्तो असर जोधपुर, बीकानेर, अजमेर, जयपुर अर भरतपुर संभाग रा जिलां मांय आंधी, बिरखा, ओळा पड़ण अर 30 ऊं 40 किलोमीटर प्रतिघंटा री रफतार ऊं हवा बाजण री आस है। राजधानी जैपर मांय आज दोपहरां बादळ छाया ज्या अर छांटा-छिड़को व्ह्यो।

000

बीकानेर रा स्वामी केशवानंद राजस्थान कृषि विश्वविद्यालय अर कृषि प्रौद्योगिकी प्रबंधन एजेंसी कानी ऊं काले ऊं बीकानेर मांय किसान मेळो लगायो जाएला। 'पोषक अनाज, समृद्ध किसान' री थीम माथे लागण वाळा तीन दिन रा ई मेळा मांय किसान, महिलावां, सरकारी अर गैर सरकारी संस्थावां हिस्सो लेवेला। मेळा मांय केंद्र अर राज्य सरकार रा न्यारा-न्यारा महकमा अर निजू संस्थावां री कोई 100 स्टॉल लगायी जाए री है। ई दौरान कृषक विचार गोष्ठियां व्हेला अर ठावां काम करण वाळां काश्तकारां अर मवेशी पालकां ने सन्मानित करया जाएला।

000

अंतर्राष्ट्रीय मोटा अनाज वर्ष 2023 मांय मोटा अनाज रा प्रति जाग जगावण सारु आकाशवाणी समाचार जयपुर री ओर ऊं नुवी श्रृंखला चलायी ज्यी है। आप आकाशवाणी जयपुर रा व्हाट्सएप नंबर 9414052368 माथे संदेश भेज र रोजीना रा खाण-पीण मांय ज्वार, बाजरा सरीखा मोटा अनाज काम लेवण रा बारा मांय बता सको हो। आप संदेश रिकॉर्ड कर र या मांड र भेज सको हो। आं मांय ऊं कुछ संदेश समाचार बुलेटिन मांय प्रसारित कर्या जावेला।

0000